

# Mesyuarat PIBG Medan Erat Kerjasama Guru, Ibu Bapa dan Komuniti



Sekolah Menengah Kebangsaan Labuan (SMKL) telah berjaya mengadakan Mesyuarat Agung Tahunan Persatuan Ibu Bapa dan Guru (MAT PIBG) kali ke-25 pada hari Sabtu lalu.

Lebih 300 ibu bapa dan guru hadir menjayakan majlis tersebut yang diadakan di Dewan Mutiara sekolah berkenaan.

Sebelum mesyuarat bermula, para ibu bapa telah diberikan taklimat berkaitan kesihatan dan keselamatan murid.

Slot Advokasi berkaitan Anemia untuk Remaja telah disampaikan oleh Cik Ainor Farahin binti Aziz daripada Jabatan Kesihatan Wilayah Persekutuan Labuan.

Manakala Koperal Encik Mohd Farehan bin Morshidi daripada IPD Labuan telah berkongsi tentang maklumat yang

berkaitan cabaran-cabaran remaja masa kini.



Slot Advokasi berkaitan Anemia untuk remaja



Slot Cabaran-cabaran masa kini

Pengetua SMK Labuan, Encik Mohd Nizam bin Yasim dalam ucapannya menyeru ibu bapa memberi kepercayaan kepada pihak sekolah dalam memberi pendidikan terbaik ke arah melahirkan “Anak yang Baik lagi Cerdik” (ABC).

Beliau juga berharap agar ibu bapa dapat memberikan komitmen dan bersama-sama pihak sekolah menjayakan semua aktiviti sekolah ke arah kemenjadian murid SMK Labuan yang unggul.

Selain itu, beliau mengambil kesempatan menerangkan Ujian Akhir Sesi Akademik (UASA).

*“Pengkukuran UASA tidak lagi merujuk gred atau markah tetapi dijelaskan melalui Tahap Penguasaan (TP) 1 hingga 6” jelas beliau.*



Ucapan Aluan oleh Pengetua SMKL, Encik Mohd Nizam Yasim MAT PIBG kali ini dirasmikan oleh Pengarah Pendidikan, Jabatan Pendidikan Wilayah Persekutuan Labuan, Encik Yusup bin Haji Mohamad.

Dalam ucapannya, beliau menjelaskan fungsi sesebuah sekolah bukan semata-mata melahirkan murid-murid cemerlang akademik tetapi melahirkan pewaris negara yang mempunyai peribadi, sahsiah, akhlak dan agama.

*“Dalam melahirkan generasi pewaris negara yang beradab mulia, sekolah perlu menjalinkan hubungan yang mantap antara ibu bapa, guru dan komuniti” ujar beliau lagi.*

Pada akhir ucapannya, beliau menzahirkan harapan agar kerjasama yang erat ini akan berterusan demi kebaikan anak-anak yang bakal menjadi pewaris kepemimpinan pada masa hadapan.



Ucapan Perasmian oleh Pengarah Pendidikan, JPWPL Encik Yusup Haji Mohamad

MAT PIBG kali ke-25 ini turut diserikan dengan cabutan bertuah. Pemenang hadiah utama yang berupa sebuah TV telah menjadi milik salah seorang bapa atau penjaga murid yang hadir.

Turut hadir dalam majlis berkenaan ialah Yang Dipertua (YDP) PIBG, Tuan Haji Yusuf bin Haji Chu Chu bersama dengan barisan AJK PIBG sesi 2023/2024.

**Berita Oleh : SMK Labuan**



Mesyuarat PIBG sedang berlangsung



Para ibu bapa yang hadir



Pemenang Hadiah Utama Cabutan Bertuah